

ENAKMEN TENAGA BOLEH BAHARU SABAH 2024

PERINTAH TENAGA BOLEH BAHARU SABAH (PERUNTUKAN DARIPADA
TARIF ELEKTRIK) 2024

SUSUNAN PERINTAH

Perintah

1. Nama dan permulaan kuat kuasa
2. Tafsiran
3. Peruntukan dan pembayaran daripada tarif elektrik
4. Penyelarasan pembayaran
5. Mendapatkan kembali kekurangan
6. Pembayaran balik lebih bayaran

JADUAL

No. S 7

[No. JPBN (S).600-1/4/2 klt.4

ENAKMEN TENAGA BOLEH BAHARU SABAH 2024**PERINTAH TENAGA BOLEH BAHARU SABAH (PERUNTUKAN DARIPADA
TARIF ELEKTRIK) 2024**

PADA menjalankan kuasa yang diberikan oleh subseksyen 26(1) Enakmen Tenaga Boleh Baharu Sabah 2024, Menteri membuat perintah yang berikut:

Nama dan permulaan kuat kuasa

1. (1) Perintah ini bolehlah dinamakan Perintah Tenaga Boleh Baharu Sabah (Peruntukan daripada Tarif Elektrik) 2024.

(2) Perintah ini mula berkuat kuasa pada 3 Januari 2024.

Tafsiran

2. Dalam Perintah ini, melainkan jika konteksnya menghendaki makna yang lain —

“bulan peruntukan” ertinya suatu bulan kalendar yang bermula dari 3 Januari 2024; dan

“pemegang lesen pengagihan” ertinya pemegang lesen pengagihan yang disenaraikan dalam Jadual.

Peruntukan dan pembayaran daripada tarif elektrik

3. (1) Seseorang pemegang lesen pengagihan hendaklah memperuntukkan dan membayar ke dalam Kumpulan Wang bagi setiap bulan peruntukan suatu jumlah yang bersamaan dengan satu perpuluhan enam peratus daripada tarif yang dikenakan dan dipungut, selepas ditolak apa-apa diskaun yang terpakai, di bawah subseksyen 39(1) Enakmen Bekalan Elektrik 2024 daripada pengguna selain pengguna domestik yang menggunakan bekalan elektrik sebanyak tiga ratus kilowatt jam dan ke bawah bagi setiap bulan.

(2) Tarif yang dikenakan dan dipungut di bawah subperenggan (1) hendaklah berdasarkan kepada —

- (a) elektrik sebenar yang dibekalkan (dalam kilowatt jam); dan
- (b) di mana-mana jua terpakai, kesediaan bekalan elektrik (dalam kilowatt).

(3) Jumlah yang diperuntukkan yang disebut dalam subperenggan (1) hendaklah dibayar ke dalam Kumpulan Wang setiap bulan secara menunggak mengikut cara yang berikut:

- (a) pembayaran bulanan pertama mengandungi peruntukan yang dibuat dalam bulan peruntukan Januari 2024 hendaklah dibayar oleh pemegang lesen pengagihan ke dalam Kumpulan Wang pada atau sebelum 1 Mei 2024; dan
- (b) setiap pembayaran bulanan yang berikutnya mengandungi peruntukan yang dibuat bagi setiap bulan peruntukan selepas Januari 2024 hendaklah dibayar oleh pemegang lesen pengagihan ke dalam Kumpulan Wang pada atau sebelum hari pertama bagi bulan keempat selepas bulan peruntukan masing-masing.

Penyelarasan pembayaran

4. (1) Suruhanjaya hendaklah pada setiap tahun menyelaraskan semua pembayaran yang dibuat oleh pemegang lesen pengagihan di bawah subperenggan 3(3) dengan jumlah yang bersamaan dengan satu persepuluh enam peratus daripada tarif yang dikenakan dan dipungut di bawah subseksyen 39(1) Enakmen Bekalan Elektrik 2024 yang dinyatakan di bawah subperenggan 3(1) berdasarkan penyata kewangan teraudit pemegang lesen pengagihan itu.

(2) Suruhanjaya boleh, pada bila-bila masa, bagi maksud penyelarasan tahunan yang disebut dalam subperenggan (1), meminta pemegang lesen pengagihan untuk memberikan apa-apa maklumat atau dokumen sokongan lain dalam tempoh yang dinyatakan dalam permintaan itu, atau apa-apa masa lanjutan yang diberikan oleh Suruhanjaya.

(3) Apabila menerima permintaan di bawah subperenggan (2), pemegang lesen pengagihan hendaklah memberikan maklumat atau dokumen sokongan lain itu dalam tempoh yang dinyatakan dalam permintaan itu atau apa-apa lanjutan masa yang diberikan oleh Suruhanjaya.

(4) Selepas penyelarasan tahunan di bawah subperenggan (1) dibuat dengan mengambil kira maklumat atau dokumen sokongan yang lain yang disebut dalam subperenggan (3), Suruhanjaya hendaklah mengeluarkan suatu laporan kepada pemegang lesen pengagihan.

(5) Walaupun maklumat atau dokumen sokongan lain yang diminta di bawah subperenggan (2) tidak diberikan oleh pemegang lesen pengagihan di bawah subperenggan (3), Suruhanjaya hendaklah meneruskan dengan penyelarasan di bawah subperenggan (1) dan mengeluarkan suatu laporan kepada pemegang lesen pengagihan itu.

(6) Suruhanjaya hendaklah memberikan satu salinan laporan yang dikeluarkan di bawah subperenggan (4) atau (5) kepada Menteri.

(7) Laporan yang dikeluarkan oleh Suruhanjaya di bawah subperenggan (4) atau (5) adalah muktamad.

Mendapatkan kembali kekurangan

5. (1) Jika laporan yang disebut dalam subperenggan 4(4) atau (5) menunjukkan terdapat suatu kekurangan dalam peruntukan atau pembayaran yang dibuat oleh pemegang lesen pengagihan di bawah perenggan 3, Suruhanjaya hendaklah, dengan seberapa segera yang mungkin, memberitahu pemegang lesen pengagihan itu secara bertulis tentang kekurangan itu dan meminta pemegang lesen pengagihan itu untuk membayar kekurangan itu ke dalam Kumpulan Wang.

(2) Seseorang pemegang lesen pengagihan hendaklah membayar kekurangan di bawah subperenggan (1) ke dalam Kumpulan Wang tanpa apa-apa faedah dalam masa tiga puluh hari dari tarikh penerimaan pemberitahuan itu oleh pemegang lesen pengagihan itu.

Pembayaran balik lebih bayaran

6. Jika laporan yang disebut dalam subperenggan 4(4) atau (5) menunjukkan terdapat lebih bayaran dalam peruntukan atau pembayaran yang dibuat oleh pemegang lesen pengagihan di bawah perenggan 3, Suruhanjaya hendaklah membayar balik lebih bayaran itu tanpa faedah kepada pemegang lesen pengagihan itu daripada Kumpulan Wang dalam masa tiga puluh hari dari tarikh pengeluaran laporan itu.

JADUAL

[Perenggan 2]

PEMEGANG LESEN PENGAGIHAN

<i>Butiran</i>	<i>Nama</i>
1.	Sabah Electricity Sdn. Bhd.

Dibuat pada 3 Januari 2024.

DATUK SERI PANGLIMA HAJI HAJI BIN HAJI NOOR,
Ketua Menteri Sabah.